

# ZAKON O DJELATNOSTI OSIGURANJA U BRČKO DISTRIKTU BOSNE I HERCEGOVINE

("Službeni glasnik Brčko distrikta BiH", br. 2/2023)

## DIO PRVI - OPŠTE ODREDBE

### Član 1

(Predmet)

Ovim zakonom propisuju se prava i obaveze društva za osiguranje, način utvrđivanja naknada u postupcima za naknadu štete koji se vode pred Osnovnim sudom Brčko distrikta Bosne i Hercegovine i Apelacionim sudom Brčko distrikta Bosne i Hercegovine (u daljnjem tekstu: sudovi) i druga pitanja koja se odnose na obavljanje djelatnosti osiguranja u Brčko distriktu Bosne i Hercegovine (u daljnjem tekstu: Distrikt).

### Član 2

(Definicije)

Pojedini izrazi upotrijebljeni u ovom zakonu, imaju sljedeće značenje:

a) "djelatnost osiguranja" obuhvata:

- 1) poslove osiguranja,
- 2) poslove reosiguranja,
- 3) poslove neposredno povezane s poslovima osiguranja i reosiguranja,

b) "društvo za osiguranje" je dioničko društvo koje je upisano u sudski registar na osnovu odobrenja za rad od Agencije za osiguranje Republike Srpske ili Agencije za nadzor osiguranja Federacije Bosne i Hercegovine.

## DIO DRUGI - DJELATNOSTI OSIGURANJA

### Član 3

(Poslovi osiguranja)

(1) Poslovi osiguranja obuhvataju zaključivanje i izvršavanje ugovora o osiguranju i preduzimanje mjera za sprečavanje i suzbijanje rizika koji ugrožavaju osiguranu imovinu i lica.

(2) Poslovi reosiguranja obuhvataju zaključivanje i izvršavanje ugovora o reosiguranju osiguranog viška rizika jednog društva za osiguranje kod drugog društva za reosiguranje.

(3) Poslovi neposredno povezani s poslovima osiguranja obuhvataju utvrđivanje i procjenu rizika i šteta, posredovanje radi prodaje i prodaja ostataka osiguranih oštećenih stvari i pružanje drugih intelektualnih i tehničkih usluga u vezi s poslovima osiguranja.

#### Član 4

(Uslovi za obavljanje djelatnosti osiguranja)

(1) Uslovi za obavljanje djelatnosti osiguranja, koje treba da ispunjavaju društva za osiguranje sa sjedištem u Distriktu, su da:

a) imaju dozvolu za rad izdatu od Agencije za osiguranje Republike Srpske ili Agencije za nadzor Federacije Bosne i Hercegovine, u zavisnosti koja agencija je dala dozvolu za osnivanje društva;

b) ispunjavaju prava, obaveze i odgovornosti društava za osiguranje koja su propisana ovim zakonom i zakonom i propisima koji uređuju djelatnost iz oblasti osiguranja u Bosni i Hercegovini u zavisnosti koja agencija je dala dozvolu za osnivanje društva.

(2) Društva za osiguranje sa sjedištem u Distriktu prilikom osnivanja su slobodna da odaberu agenciju iz stava 1 tačke a) ovog člana, kojoj se podnosi zahtjev za izdavanje dozvole za rad.

(3) Postupak podnošenja zahtjeva i uslovi za osnivanje propisani su entitetskim zakonima iz oblasti osiguranja.

(4) Prava, obaveze i odgovornost društava za osiguranje utvrđuju se ovim zakonom i propisima koji uređuju djelatnost iz oblasti osiguranja u Bosni i Hercegovini.

#### Član 5

(Naknada troškova postupka pred sudom)

(1) Društvo za osiguranje u postupcima za naknadu štete pred sudovima u Distriktu ima pravo na naknadu troškova postupka u skladu s advokatskim tarifama.

(2) U slučaju da advokatske tarife nisu ujednačene, društvo za osiguranje obračunava i potražuje iznos koji predstavlja aritmetički prosjek dvije tarife, Tarife Advokatske komore Federacije Bosne i Hercegovine i Tarife Advokatske komore Republike Srpske.

#### Član 6

(Nadzor)

(1) Nadzor nad poslovanjem društva za osiguranje sa sjedištem u Distriktu vrši entitetska agencija, u skladu s propisima iz oblasti osiguranja entiteta.

(2) Filijale društava za osiguranje, koje obavljaju svoju djelatnost u Distriktu, su pod nadzorom entitetske agencije prema sjedištu društva za osiguranje.

#### Član 7

(Stupanje na snagu)

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine.